

# FREE WILLY RIOT

Zamme uff d BARRIKADE



BEBBI  
STAMM 2013



## MIR LÖHN E PUSSY NIE ELAI

FUCK CORTÈGE

### E PUNK-GEBÄTT

Oh heiligi Muetter, y fleh di ganz fescht a  
heb doch Erbarme mit däre Nadeschda

**KEI MACHT FÜR NIEMERTS!  
KEI MACHT DR GWOHNET!  
GRUBBESEX IM NYNTE MONET!**

Y bitt Di, schütz mr no Aljochina  
au die sitzt im Gulag und d Jekaterina  
Samuzewitsch hoggt ein nääbedraa  
d Kinder hietet schyynts dr Maa  
2 Johr Kische, so vyl wär kläärt,  
griegsch z Russland für e drümmliigs Polit Punk-Konzärt

**HEY PUTIN, HEY KIRCHE, HEY PATRIARCHAT!  
MIR MACHE USS EUCH IM FALL ÄRBSLI-SALAAT!**

Und zwor uss Prinzip, und voll engagiert  
will so wie dr Putin sich do grad uffiehr  
d Kirche hofiert, dr Richter bitz schmiert  
das schloht – bisch sensibel – halt scho bitz uff s Gmiet  
Und scho proteschtiere d Menschemasse!  
E jeede ka s Unrächt wo gscheh isch kuum fasse

**DRUM FREE PUSSY RIOT! HEY KUMM, MACH AU MIT!  
FREE PUSSY RIOT! FINDSCH AU, DAS GOHT NIT?**

Wottsche n ehrligi Antwort? Y gang mit Dr einig:  
ins Loch numme wäg dr politische Meinig  
Isch nit nur in däm Fall kei gueti Idee  
das hett me grad z Russland scho gnueg miesse gseh  
Uff dr andere Sytte – Lueg moll die Beweegig:  
Empathisch, am Laigge, in höggschter Ereegig  
Versuffe si fascht in Sälbschtfriedeheit  
Dasch Hipster-Züüg! Nyt Ächts! Duet mr leid

**WÄRSCH AU MOL GÄRN PERFORMANCE-KÜNSCHTLER?  
HÄNG HALT E PLAKAAT ANS FRAJEMÜNSCHTER!**

Hejoo!

Uns beträffe extrem die Problem  
vom ene patriarchalische Gsellschaftssyschtem!  
Y bitt Di drum, verzell mr no meh!  
Villicht ka s jo sy, dass y s denn ändlig gseh  
worum mi das mobilisiere sott  
Ob y d Roten nid kenn? Die isch glaub no ganz flott  
usser si schribt vo Problem so als Frau  
Stichwort: Lifestyle-Feminismus-Buuchnaabelschau

**DR FEMINISMUS ISCH THEMATISCH DOCH TOT,  
WENN S NUMME NO UM D QUOTE GOHT!**

Will all sini Forderige – usser die mit Prozänt  
sinn praggdisch erfüllt und Du frogsch Di am Änd  
Ob grad dr neuu Regierigsroot im Zämmehang  
mit sällem Change-Prozäss stoh  
Wenn är meint am Fryttig gieng är hei go wäsche  
E wytters Exämpel und saggstark im Smashe  
isch dr Roger Federer – ATP 2  
wo ab und zue hyylt und au staubsuugt dehei

**D EMANZIPATION HETT ÄNDLIG GWUNNE!  
STATT MÄNNER HÄNGE WÖSCHPLÄTZ UMME!**

S dunggt ys zwor schad doch de Mysli schynts rächt:  
Männer sinn Pussies und nümme s stargge Gschläch  
Schön sydig, treu und stuuberein  
mit Allem riich gsäägnet, am Zwölfi deheim  
könne si so spoot no ihri Gefühl artikuliere  
und dängge drzue: Muesch di halt arrangiere  
wenn d nit elai n alt wärde wottsche  
Denn schluggsch halt die Pille, denn machsch halt dr Dottsch

**ABER NIT MIT UNS BEBBI! DAS KA DR SAAGE!  
MIR STÜGGE MIT EUCH PUSSIES UFF D BARRIKADE!**

Und fordere n y, was lengscht fellig isch:  
Das Gender-Dossier muess zrugge uff d Tisch!  
Mit Schwärpunkt Männerförderigsprogramm  
Umfassend, seriös, das goht 10 Johr lang  
Drum föhn mr grad aa mit dr Beweegig  
Sinn quasi wenn d wottsche en Art s Geegestügg  
vo Pussy Riot, und das isch Ihr Glügg  
Wie dr Willy, dr Wal, dä iigschpeerti Fisch  
muess dr Maa zrugge in d Freyhait drum sag y wie s isch

**FREE WILLY RIOT! UND D PUSSIES GRAD AU!  
FREE WILLY RIOT! SUSCHT GITTS RADAU!**

Die russische Schweschtere zeige wie s gooht:  
Provozier bis kei Stei uffem andere me stoh!  
Entwey mit Pangge e heiligi Halle  
mir dien drum am Cortège d Gitarre n aaschnalle  
Und gänn e Free Willy Riot-Konzärt  
Das passt denn nit jeedem, doch das isch dr Wärt  
Vo däre Polit Performance Aggzioon  
gseht ei Willy d Frehait denn längt das an Lohn

**SYG AU MOLL WIEDER E GANZE MAA  
UND STAND UFF DINI HINTERBAI!  
SCHLISS DI DR FREE WILLY-BEWEEGIG AA:  
MIR LÖHN E PUSSY NIE ELAI!**

S Ladärne-Gstell stoh konventionell am Münschterplatz und lüüchtet hell  
vom Määntig zoobe bis am Mittwoch am Moorge  
usser dr Stromstegger liggt z fescht verborge.

S Requisit wär d Bar vom Grotto - Du kennsch dörnt allwä s alti Motto:  
Me kennt sich zwar aber hebbt dr Latz, drum stelle mrs nit uff d Kasärneplatz.

Wottsche rueh vo Dim Sohn am Mittwoch Oobe, dien mir en gärn mit Fasnacht blooge.  
S profitiere n alli per se – frog doch dr Michel Ries, dä verzellt dr gärn meh: 079 651 14 26